

靜

廉

齋

詩

集

靜廉齋詩集卷十三

仁和金 姓雨叔

輓句山前輩

辛卯

書堂絕跡陳公隕老淚驚隨杜老潛戀闕重來應死報

臨歧小別憶生還

己丑假歸會有詩送別

俸錢空沐

恩波厚

入直

未補

特旨給

俸竟未及領也子職翻愁祿養難大錯鑄成違勿藥此

身那得石同頑

青青衿佩記論交簡髮相看白到梢縹緲三天容接武

棲遲一壑共安巢深杯測隱超占卜險韻爭奇類劫鈔

豈意風流今頓盡應從禪理驗浮泡

人種纔延一綫危敢誇長大稱家兒待看就傅明年事
留得含飴異地思生日那堪惟祖在死期還怕遺耶知
束裝草草都如夢愁絕征途夢斷時

得三吾寄弟詩疊用其韻示之

子舍兼官舍都如傳舍過正緣干祿切時覺望雲多珍
重春暉影迷茫宦海波中廚元有米於汝意云何
掌珠聊把玩石火屢驚過捧檄殊非急含飴不厭多重
占璋協夢蚤遣鵲浮波牛女仍相望孫枝茁幾何
典司惟秩祀扈蹕岱宗過翹首南歸近關心北望多驥

衰慙識路魚化借騰波得失應先定無煩喚奈何

汝弟牽塵務絲夢不啻過科名愁徑仄門蔭祝恩多

未免疎黃卷偏教憶綠波荆枝共春日榮悴竟如何

我昔曾持節觀風粵嶠過奢華成俗久貨寶蕩心多好
作中流柱休隨東逝波律身家法在寧待引蕭何

題遙參亭

王母益虞圖元女授軒籙自古重神仙陽每爲陰伏將
母肇胚胎先天地生育山谷牝牡分賦形男女足神道
本自然強名嗟已瀆無名混物始禮秩黜標目神遂享
鴻名揚靈仍錫福惟應致崇奉寧待詳氏族元君諒仙

清風雅集卷之八
宗寄治東方嶽大德衍資生仁壽慶彌篤降香邀萬
乘躬奉安輿祝嘉祉應延洪九有恩膏沐平生登岱
志老去竟縮朒稽首遙參亭慈容欽睟穆却思梳妝院
未免褻瞻矚升階尋壁畫炫彩特華縟誕降洎成真不
知何代錄悉達與觀音大略倣遺躅流傳誇聖蹟列肆
刊圖鬻朝山羣購取尊信豈嫌黷我意哂無稽繕治宜
摧剝仙宮返清淨觀德乃彌肅沈吟推象教頗足牖民
俗羣情久傾注徼福從善速二氏瞰其微繪事巧相角
濫觴起騷人天問原荒邈丹青留俗語指摘轉煩數神
聽似和平靈風迴繡幄

謁岱廟

青祇主東方時邁首述職靈昭產物聖位協安仁宅金
天乃司刑木正惟宣德我

皇普懷柔岱宗優長伯祠官虔秩祀銜命陳香帛神心
通肸蠭膚寸驗觸石甘霖契默禱千里沛膏澤福應旣
旋臻蕃釐諒多益重闡幾登降偃僂自屏息翹瞻天日
表心肅首還抑古稱靈威仰鴻號豈虛錫階階東西走
對宇修廊直羣神謝雕塑設色繪滿壁七十二司聯貴
亦王侯敵文書各堆案一一嚴考効非刑或春磨輕罰
猶斬磔春生用秋殺神理寧反易沈思亦有以刑德相

輔翼民風慙古若冥報猶悚惕泰山傳治鬼魂散攝其
魄府君泊錄事晨夜理符檄岸獄藉旁分蒿里接咫尺
此典列儒書流傳先道釋鬼神佐王道幽顯同糾慝禍
淫斯福善偏陂總歸極陰陽良可徵傳會適滋惑震本
長男宮神詎無家嫡遽託姓名傳炳靈陪廟食斯人出
何代紂絕陰天黑荒誕作神羞倘亦秩宗責祀典幸無
濫不足煩指摘神叢蟠古木歷載動千百兩大特標奇
唐槐追漢柏人誰如汝壽爲植長生域卽物悟栽培自
得神明力

亞聖位分獻恭紀

南北行瞻 亞聖祠卽今何幸侍天儀香升未覺堂階峻
居近會無几席移四配傳來成絕學七篇誦處凜嚴師
寸心但解存私淑待後先期廟有爲

敬題 宗聖廟三省堂四首

鑾停闕里表尊師銜命升香 宗聖祠南武佳城傳舊

碣廟在嘉祥縣南武山之陽墓在南武山西南元寨山之東麓明成化初或陷入穴中見懸棺其前石碣鐫會參之墓碣後流落被毀重建改題廊國宗聖公之墓 東山秀脈認分支來游同

應麟書瑞宗聖家於武城卽子游爲宰之地今東昌府屬之武城縣當時非魯地也其墓則在南武城武城卽鉅野西狩獲麟亦在於此金置嘉祥縣蓋取諸此焉 繼起還扶鳳德衰欽仰

三朝宸翰重斯文光顯日星垂

喪予痛罷嘸宗子道統危于絕續初貫一特傳明有寄
省三精習信無餘見知運協千年聖啓後功全四子書
思孟同堂長配食居然坐奠兩楹如

傳經惟孝古今稱家學偏宜善稟承沂水春風元浩浩

臨深履薄自兢兢守身直待全歸免養志應從不辱徵

千古萊蕪崇廟享

父哲自宋封萊蕪侯廟在宗聖廟西

逮存仍喜共嘗蒸

眸容端冕几筵開彷彿黌宮釋奠來黃紙謄文尊制詔

青衿襄事潔尊罍

執事諸生多族姓子弟

禮儀職忝祠官供紹述

功期賢裔恢先子當年憑魯得於今莫負育英才

臨清感舊

棟萼感兄弟嚶鳴懷友生人倫適不幸二端畸重輕厚
薄苟無序恩怨亦失平我昔困蓬轉正類偏枯荆故人
偶招致單舸來臨清遠惟蘭譜契益申車笠盟師友義
兼切相與期有成寧知樂豪舉不念高臺傾顧盼殊自
得諛媚紛承迎閒情耽女蠶不飲如中醒風流佳公子
虛幌明孤檠發冊舊疴作課文匱鼎呈我時慚失職規
切顏常頽負人人負我太息仰屋瞠未能見幾作潔已
聊硜硜取疏終自辱決去無留行分手十五載盈虧虧
或盈客主頓易位責報騰惡聲自反故無歉何至裂眼
爭促坐爲款語不平毋妄鳴官方蚤檢飭意外誰彈抨

驕兒誠就範頭角還崢嶸身名本俱泰林壑勝簪纓有
謀都不用我實無愧卿鹵莽作抵突酬答慙瑤瓊徒償
脯脩直幸非逋負羸聞義尙知服何策補剿黥舊意總
教盡活計終難管淒涼身後事遙聽神爲驚子姓半飄
蕩誰復籌墳坐試爲封馬鬣詎必傾金籀喪主顧何在
念此空忤忤論交醜隙末羣聚同鸚猩浮雲雖善幻舊
雨宜滋榮向無一枝託行跡彌踣蹙匹如墮水客浮木
方前橫因依還傍岸不減孤舟撐在彼匪施惠於我良
有情忘怨却思德風雅無譏評言從漳濱役往事迴腸
縈若敎訪權署一子留空枰鰲頭竦形勢彷彿孤游鯨

周檜引唐槐終古凝菁英柳林眠起倦姿態先秋更濡
毫杼感愴簡外聞哀箏不須悲宿草陳根方待萌及身
儻未了兒輩明吾誠麥舟有成例弗煩厥考令

和陸治自題所畫綠牡丹韻

國色圖成擬出藍新陰漸滿繞叢看鏡奩應借青瑤映
舞態誰憐翠袖寒桃熟三千遲取醉城開十二稱憑闌
還將佳兆貽衿佩富貴先霑九烈彈

葛山先生席上詠蔗蟬

刈蔗留根濕生蟬動狀如
未蛻之蟬但小僅五之一

耳聞俗燭以侑酒劇
有風味因系以詩

餘甘留蔗本生意寄蜩宣迴勝蛻九潔行隨蝶夢仙高

情戀風露小劫墮熬煎佳境空拋却誰看羽化先

七十初度述懷二十首

各首自注生平梗概以當年譜俾兒輩知之

八袞翁留萬里程嚴親扶持竟歸耕孫曾自足娛重慶

子母何堪痛再生幸屆成童看樹立仍期擢第備科名

卅年轉眼終虛度慚負椿萱久待情

先祖奉直公於康熙庚辰以師宗牧

請老年七十七矣先府君資政公隨任十年侍奉歸里

○壬午八月十五日姓始生先大兄生長男實先於姓

後殤姓生時母子俱絕而復蘇先太夫人既憫產難又

苦多病常祝願得見姓至十六歲即願足矣及姓於癸

卯幸獲鄉舉堂上並康彊無恙屬望轉深豈知踰證公

車年踰三十尚不得第甲寅丁巳遂疊遭閔凶抱恨終

天曷其

有極

黃髮林泉愛日遲童孫偏許侍含飴六如偈聽香燈畔

千字訛拈課誦時餘慶合邀清白報聯科預遣弟兄知

七年前記瞻芝臨洪氏松毬未足奇

先祖林居十載壽八十六考終於諸

孫中特鍾愛姓每食必侍先祖一生虔誦金剛經姓自幼識之就塾始讀千字文先祖常晝晚教課先祖歿於己丑四月辛卯科擢發之夜大兄夢先祖趨入館舍含淚撫之曰我適看楠來可憐汝又不中大兄哭請究有中時否曰但得同弟入場汝卽中矣餘語尙多兄秘不洩庚子姓勉強觀場兄果得雋○祖墓在青芝臨松結大毬徑數尺乾隆乙酉冬省墓始見南宋洪容齋兄弟先坐實有此祥見毘陵志

移家北郭未全貧奉杖逍遙別墅新竹徑萌抽參玉版

桂叢香滿候冰輪資生尙有田園在督課常教燈火親

象勺舞來真最樂頗聞詩學及茲辰

康熙乙酉先資政奉先祖移居武林

門外長板巷姓時甫四齡先資政好詠詩自幼教識平仄十餘歲時亦解寬句

督喪終訟日淒清今雨原非舊雨情自有塾師徒煖席
遞傳家學幸難兄同依夏屋時維戊催上春官歲在庚

三載幾曾留卒業甫踰弱冠浪成名

先祖歿時生計已薄先資政營產管

弄復因花市典屋勒買構訟家業遂盡今雨堂之名先
資政徙宅時有慨而寄意焉故姓至今不敢易○丁酉
以前家日落而業亦荒戊戌從先兄讀書范氏叢碧樓
始識作文踐徑自兄庚子會試後奔走四方姓未得卒
業癸卯遠領鄉薦殊可愧也

蚤緣中表締嘉姻菽水還能助食貧但覺尊章添愛女

可知子婦奉慈親魚軒象服榮斯稱雨散雲飛恨莫申

同穴那堪增悵望淒涼四紀滯湖濱

元配王夫人其祖與先祖爲友壻夫

人余表妹也康熙壬寅來歸雍正丁
未遭產厄厝湖上者四十五年矣

玉琴絃絕韻難調鳳觜眞應倩煮膠愁遣寒機中幅裂
博將嘉穀滿城拋兒曹半恃持門重女伴都無出相交
耆壽早蒙君舅許占年何待索瓊茅繼配胡夫人己酉來歸余壬戌擢第
郡伯邑侯循舊例請登城撒穀一時傳爲盛事○夫人燕見舅姑先資政偶感前事祝之日將來且活六十歲今亦六十八矣

埽空舊宅換新阡家釁潛萌劇可憐荆樹頓看榮復悴
雁行差喜斷還聯永懷鞠子推恩久無那癡兒賦質偏
景涉桑榆寧遠照尙留愁擔後人肩己酉大兄由保舉發湖廣試用得官
後議售去湖墅舊宅復遷入城自是繼丁內外艱家事將興復替

江深漢廣置杯膠山左聊堪作繫匏隙末未能蠲俗態

有初良足拯貧交寧知雁陣留孤影重過鰲磯認舊巢

太息河陽花事盡幾時宿草茁新苞

姓自己酉楚游不遂庚戌下第後常

就館二東同年潘雲麓司馬監稅臨清往來最久情
意頗厚後忽因督課嚴急失歡迨銓甲戌視學安徽潘
投老罷官尙來苛責既歿而後人潦倒殊甚今春扈
從東巡重過臨清曾作長篇弔之誓爲營葬願未得所
付託也鰲頭磯
者臨清地名

誰將騏驥望駑駘責善承聞本禍胎乍喜珠明期有定

縱非蘭秀肯教摧臨文蚤痛傷心賦弔古寧忘思子臺

怪得孫枝生意少忍占兒齒壽徵來

悼長男三事以非命終此余一生大

缺陷事不
忍諱也

有兒難守一經傳捧檄低顏嶺海偏老我不須資祿養

愛民惟在廣情田循良偽託猶編史忠信堅持可涉川

治譜久留曾大父戴星時省柱間聯

先祖作令牧時常題柱聯云報朝廷

某事榮祖父某事惜百姓幾分留子孫
幾分次男三吾捧檄粵東謹錄授之

春秋鎖院染丹鉛辛苦猶能記昔年馬勃牛溲元並售

紅鸞白獸豈先傳莊園自可安荒落要領終須慎棄捐

每向尊前語同志樗材寧止得天全

甲子典試廣東丁卯順天分校壬申

春典試江西癸酉典試

山西甲戌會試分校

洪都潛嶽兩衡文水鑑元從清濁分不改清心滌塵滓

何難秀質擷芳芹游觀少樂徒增擾膏火潛銷豈報勤

未識步趨行我法黌宮還應鼓鐘聞

甲戌至丙子督學安徽丙戌至戊子

督學江西凡學使游觀名勝必重爲地主費且冠蓋承
迎了無瀟灑登臨之樂姓所至從不紆途棄日便道舟
車所過悅目賞心已有餘矣

同年隔面任譏褒古誼惟應寄我曹只恐乘車輕戴笠
常將後笑恤先號談諧正取宜風月投報寧須問李桃
贏得人傳壬戌派朋歡猶得齒賢豪同年中外無間患難相周真率之會殆無虛月席間必分取果餌歸給童稚時多慕效戲稱壬戌派云

家法 熙朝豫教嚴細旃終日理牙籤詩文聊附傳經
及德業真從養正兼秋實春華先自審金昭玉粹盡同
瞻回頭十五年來事祇愧天廚賜饌霑丁丑入直尚書房

西園飛蓋限同游絡繹詩篇任倡酬峻望那堪追賈輩

清詞猶欲擬枚鄒每慙燕石重函啓旋喜隋珠滿握投

馬齒卽看邀祝願十年兩度錦囊收

皇子年長者別居西園諸位皇

子尤敏於詩每有倡酬應接不暇

皇四子嘗與姓共

疊打字韻五古各得四十首姓辛巳六十及今年生日

荷諸位皇子皇孫皆有詩見祝

憶從水觀倚樓初秀挹皋亭翠靄餘負郭有田元絕想

立錐無地孰休居聊憑傳舍供遷轉還挈官廬任卷舒

水觀樓在湖墅舊居東南隅俯臨河

作繭未成嗟已老莫嗤戀棧忘懸車

居東南隅俯臨河

渚遙望皋亭先祖禪誦於斯先賢政樂志幽棲者三十餘載姓服官三十年杭城迄無一椽之居

鄉里論交幾輩差誰教窮達總天涯新圖尙憶題松靄

舊雨頻憐謝藕花風月開樽同隔世湖山埋骨始爲家

八旬幸有陶軒健昨寄霞賤細字賒

歲在癸亥家江聲兄曾以倪穉疇前

輩所畫六憶圖屬題愚兄弟皆有題句圖中一幅寫讀

書靈隱松靄山房景姓昔年亦嘗與汪水蓮先生家元

美兄游息於斯時皆已化去詩意感慨係之今先兄暨

江聲穉疇俱久歿圖亦燬於火○康熙壬寅姓與友十

八人聯文會於藕花居十八人者何孝廉鳴世地瑞吳

中翰子廉國諤吳副東春郊景任太守處泉應烈孫副

車介斯曾親錢中翰蒼益在培汪孝廉履順金城汪太

守介純宏禧梁侍講護林啓心杭編修堇浦世駿梁文

莊相國詩正王教授琬華瀛洲族姪司務赤泉煨孫銀

臺虛船瀨陳銀臺句山光嵩裘編修滄曉肇煦陸掌科

賓之我及姓也今惟姓與錢杭王在○姊夫王陶軒涵

今年八十近答姓祝壽札紅紙細書不異少年手筆聞

耳聾復聰健

步不須扶杖

南人使馬本緣慳先子當年罄控嫻執御莫傳徽泛駕

看花得路想開顏時來芻豆元非分老去馳驅遂不閒

大獮受降王會盛且隨立仗出天閑

杭俗畏馬兼薄騎馬者先府君久在

滇南馳騁既嫻且善相馬後恐馬逸衝人間居遂常以爲戒姓至己酉庚戌冬春間自楚入都始解騎馬臚唱後例得乘馬歸第先君已棄養九年矣○今歲隨駕木蘭值土爾扈特等部歸順來朝

圓顱那得現方瞳修短憑分百歲中寶嗇精神差耐久

激揚意氣敢爭雄齋前未伴支離叟鞍上聊充矍鑠翁

從此幸能如祖壽得孫猶及見成童

行年七十僅有一孫小名同祖亦以

中秋生也正月復殤欲如姓之侍祖寧可冀乎

龍章載錫荷

恩光家慶應隨

國慶長南極重開週

甲算西池正晉萬年觴蓬瀛仙侶人惟舊典禮春官職

更詳九老如聞許承乏香山圖畫待傳芳

辛未於贊善任內辛巳於

詹事任內兩遇 覃恩封及父祖今年恭遇 覃恩竊擬地封會祖父母未知得如願否○香山九老現任二品以上文臣班內初擬以姓備數尋額溢不預

萬樹園 賜觀煙火恭紀

萬樹花明火樹開仙韶壘奏翠華來層霄乍列周天宿
廣野旋奔殷地雷震耀本堪申武節陽和直似放春回
時蕃部及新降皆預 獮禽藉展懷柔義點綴聊憑百戲催
布庫秋千舞燈及回部緣竿戲法穿狹緣梯走索踏缸弄盤高麗筋斗等百戲間作

赴園獨直寓禮部朝房作

星官留獨坐

皇太子侍皇太后留園

講席擬分司水落荒園圮

冬閒列署移容臺尋履迹經筵寄燈帷偃僂循牆便直入

由內閣繞南書房後至
福園門皆沿官牆東去
委蛇退食遲檐牙送禽語窗影
颭風枝遠役勞筋息幽棲僻性怡答書聊簡折餘事卽
詩隨顧影殊增戀徒賒一月期

奉

命祭告南海恭紀

慈慶覃敷祀典崇龍香遠降祝融官禮官率職乘輶出
聖主垂恩錫福同

十二月二十八日出都先
一日仍蒙恩賜福字

老去圖南

無壯志春回極北引祥風卅年重向會游地彌愧漁洋

詩句工

甲子使粵今廿八年矣王漁洋
康熙甲子使粵有南海集故云

靜廉齋詩集卷十三終

靜廉齋詩集卷十四

仁和金 牲雨叔

望雨 壬辰

蟬吟良易飽魚目總無鰈不厭風塵困惟愁雨雪慳田
功非使職歲事共民艱何日征衣濕春泥點碎斑

過包孝肅祠以日暮不及謁

包公讀書處亭沼重完葺暮景迫遐征清風遠相襲我

昔校文時鄰祠嘗拾級

廬州學署有包公祠嘗瞻禮遺像相傳爲公讀書處卽香花墩

也遺範仰河清如室頗容入嶽嶽愧風棱硜硜期介立

回頭將二紀一意守所執誦法倘終身臣年亦七十

舒王墩

謝公邱壑久徘徊千古風流土一杯尚有荆舒爭地界
那教人不覲碑材

桐城輓姚南青

同年幾個恰同庚每過龍眠唱和成今日重來披宿草
自憐猶探嶺梅行

黃梅感詠疊壬申舊作韻

香信遙傳嶺上梅楚疆重遣陟岡來吾兄當日眞名士
失路空勞試吏才巢燕尙憐黃口哺原鴿又見白頭催
公程莫趁還鄉便如聽家山松吹哀

九江喜雨

兼程趨九江雲陰占改色中宵或斷渡奮飛乃無翼豈
知蒸潤速暮雨遽來集江豚伏不動放棹穩如席起望
琵琶亭冥濛煙霧隔列炬到江城脫將新着屐冠蓋迭
承迎謁入不容息常談先勞苦卽事慶膏澤南北雨暘
殊更請述身歷我從淮北來未見芳草碧白過合肥城
間逢疏圃闢北峽控舒桐依稀抽宿麥青蔥雜蕉萃百
一豈相敵人春已兼旬生意何艱澀惟待沐雲油頓敎
發土脈氣機欣乍轉孚甲應時坼志喜實同心抃手共
加額送客繞庭階簷溜隨衣滴燈燄久含青尊開獨浮

白隔屏間竊議羣僕如鼠啣衣襪厭泥沾馬蹄防石路
我聞嘆且笑當喜反增惕不知稼穡艱此曹安足責占
需未占解還恐不終夕投牀聊引枕疲極轉酣適鄰雞
催喚起缺月正側匿偉哉造化功闔闢誠不測行旅與
田家一舉兩饒益促駕入廬山山容新洗滌

廬山卽目

度嶺已登峯綠溪尋入谷一重復一掩巖壑藏衍沃川
情環抱密水脈灌輸足生意久含滋萌芽待時伏迎春
俄奮迅括動自飛鏃我來欣乍見秀色如可掬菜畦黃
蝶翻麥隴碧簪簇天然增絢爛歲事卜成熟桃李逞妍

姿詎堪資果腹宵來雨未透那得發生速應知土膏厚
不假天漿漉得雨倍芳鮮美鬢值新沐幾度到廬山或
向東林宿未探繡谷花莫聽銀河瀑卽此十分春征途
良悅目絕勝大江南沈吟淮以北

舟次戲書

肩輿閱三旬趺坐學持誦今朝解禪縛聊借一葦送篷
窗敷臥具無夢悟如夢佛子疲津梁豈真關脚痛穩睡
到齋時隨緣還受供廬陵米價高問取亦安用行行贛
石近灘號記惶恐爲語娑竭羅雨點莫拈弄

自萬安至烏兜驛

魚梁城外路山勢夾江長雨歇憑帆卸沙平待笋將畏
途辭蜃窟紆道認羊腸岸遠開村落峯迴偪礧岡盤縈
時出沒峻削少包藏上界重霄徹中流八陣張林端送
飛旆壑底望危檣激響真如沸遙聞亦爲忙淩風繞雲
棧隨水下溪塘未免垂堂警終無入坎傷烏兜三舍近
阜口一舟杭從阜口以上渡江緣西岸入山則橫截灘險自此不復見灘矣絕渡緣荒
逕層巒起列障亭幽出自穴坡陡復于隍選勝元無意
馮生信有鄉叢篁圍作柵雜樹密如秧松蓋貪移種茶
尖想焙嘗苔紋披古繡鳥語咽新簧犢讓山童健桃欺
邨婦妝寧知樂泉石自足老耕桑草草空增羨閒閒本

若忘匡廬看彷彿盤谷擬徜徉維昔虔州役徒愁贛石
妨傍灘留複道隔峽隱康莊不解催郵騎惟知覓權郎
迷方徵水陸眩目愧文章老去應重到吟編補未詳

阜口渡江後行亂山中經五眼橋福子垵下分水

嶺赴贛縣

贛山斗拔藏迴溪我行升降百折梯高出雲表雲莫齊
下臨無地穿重閨頑石塞道縮殼蟠危橋架壑飲澗霓
麤砂細礫布蒺藜藤梢竹刺勝磨笄山田貪種無町畦
官道劣堪容履鞮微茫一綫繞旋蠡有時滑澁黏糖餠
筍輿前却觸藩抵偏仄入角懸病僕失轡馬踣蹄

儻墜石穴白作齏征衣敢惜絮沾泥擔夫應和常含悽
輶軒在險同雞棲驚心駭聽不復稽草樹叢蔚兼貞蕤
松張勁鬣楊新萸桃紅恰間香雪梨景色點綴分東西
移將平地客思迷峯巔戍卒面目黧銅鉦釁圻其聲嘶
垵名福子誰所題不勞守捉護耕犁太平清福忘號啼
邨婦赤腳頭不篋抱哺望官徐掩袂羣兒一闕鹿引麕
似笑官老不足擠好語乍聞養馬奚從此下嶺平如隄
中央殊高兩頭低吉贛龍脊憑分攜不因原隰窮攀躋
地脈那得窺端倪

雨度梅嶺憶李文木太守

秦塞空傳是極邊

南康記大庾嶺三十里至橫浦有秦時關其下謂爲塞上

霸圖殘

劫釀龍川海濱蛟鱷驅除人雲路鯢鵬變化全卅載蚤

看迴使節七旬誰共拂吟鞭梅關記得征衣濕舊雨分
飛倍惘然

張曲江祠

姚宋逢全盛開天惜鮮終維公差晚出致主失成功自

有導山力

梅嶺實公所開

偏教陳鑑空靈祠供羽扇想像曲江

風

舟過曲江乃聞三吾猶在翁源益未知余來也

暫遣花舟入增波自曲江未須窮五嶺已復度三瀧官

舍覺留隻家音鯉阻雙靈池應照影空自憶眉龐

翁源有靈

池山相傳龐眉叟時見池中因名翁水

過清遠峽

禹峯七十二相對眼重青誰現侍臣相長依帝子靈禹
功殊未到舜瑄已先聽閩水經千古應憐聚散萍
禪宗通幻化古蹟慣追摹猿有思歸日寺仍飛去無但
教留勝境自足引清娛不復便登陟遙詢參學徒

沙口候潮

三水抵羊城計程一百七逍遙順流去猶勝御風疾風
師似相妬振響聚吹簾我嫌侵夜到地主訝倉卒辛苦

恤舟人牽江任收絳夜半復開頭旋同膠柱瑟曉看沙
口阻波底現蹊術涸轍在通津非潮不能出因知滄桑
幻託寓朝夕一愁蚤轉愁遲行期故難必却思甲子過
曾點篷窗筆今日候潮迎詩識宜徵實甲子過三水詩
有更煩迎取浙

句江潮

候潮歌

粵潮遠遙浙潮雄平流絕少波濤洶百里逆上力欲窮
灘磧吐茹時噎胸船人借力無全功登舟入水常怱怱
推排穿距左右攻手足四據腰背弓亘靈壁山作勢同
篙頭彎彎偃月空側肩倒擔摩肩紅尻高首下角觚容

叫嘯慘淡齊鼓隴聯檣竭作婦孺供褰裳時見頭飛蓬
事急何暇司朝饗小兒見慣偏樂從狎水不愁當水衝
沉值水淺多沙壅一跌祇如杵在舂上下出沒神氣融
矯捷欲追賓獵蹤未老足稱老阿童候潮潮至勝乘風
移晷僅看咫尺通穹洲竦脊如伏龍水力遂緩輸人工
嗚呼莫輕水力矜人工無潮袖手篷窗中

承祭南海神廟禮成述事

天池噓喻波羅江

廟臨波羅江故
世稱波羅廟

海天極目青茫茫南

宮朱鳥哆鵬昧嚮明應安百谷王恭承國慶舉秩祀

北東西海趨南方三神舊出廣利下祝融顯鑠騰朱光

維

皇錫命重祇告冊祝典貴蟠雲章名香制帛出內府龍
旂前導羽蓋張翳余忝廁禮官列銜命疾驅臨五羊星
瞻北斗對南極水陸七千寧阻長新春舊臘總言邁未
滿五旬旋卸裝潔齋越宿趣行事有司春祭如相望前

辛後壬擬彤繹恰喜方伯聯輕航

本省每歲兩祭必以春秋仲月壬日是月

十七日壬子姚方伯成烈循例將往而姓適先期至乃致齋二日同行姓先於十六日承

命祭告姚亦陪祀

扶胥海道紀八十古今形勢殊滄桑但乘潮落泛清淺
穹龜長魚安所藏精心靜竢五鼓作靈祠列炬環齋房
連朝陰雨乍開霽史巫引入行偃偃祇愁目短或蹉跎

靜康齋詩集卷十四

七

內疚豈須神降殃薦禱興俯幸無失若有扶掖於其旁
牲醪筵上送芬苾金石階畔傳鏗鏘禮成三獻視燎已

心氣寧壹無徬徨更衣待旦重瞻謁自堂歷寢徐端相

九章冕服稱威重夫人宋代曾添妝

宋至和元年加王冕九旒青衣五章

朱裳四章又內出花釵九株桂襦簪鑲署曰賜明順夫人皇祐中所封號也

六侯配食展獨

坐司空望遠魂飛颺珍木初傳佛國種江津神宇名斯

彰分風壁流或有助揚靈合許隨麾幢

配以六侯其一曰助利侯即達

奚司空也今門左別有像達奚司空者相傳蕭梁時西域波羅國有貢使攜波羅子二枚登廟下種風帆急舉船衆忘而置之其人望而悲泣立化廟左土人以爲神泥傳肉身祀之一手加睂際作遠矚狀廟中始有波羅樹以故廟及江皆名波羅波羅樹者即佛氏所稱波羅蜜也

殿中左右兩銅鼓閱古

定知經漢唐冶鑄精工色斑駁風雷送響驚重洋寇攘

自遣鐵索斷寶飾何惜金鼃亡天留神樂侑神誕恨我

遲來三日強廟有銅鼓大小各一大者徑五尺高稱之

唐時高州刺史林靄得之蠻酋大冢以獻

節度使鄭綱細細獻之廟中其制中空無底釧垂四懸腰

束而臍隱起旁有兩耳通體作絡索連錢及水穀紋色

微青如鋪翠半斷起如辰砂銅質盡化金精獨存有光

瑩然可鑑邊際舊有蛙六今不存而爪痕尙在其小者

殺大者五之一高亦稱之製類大者或謂出潯州銅鼓

灘太守取之懸於四穿樓四角有金蝦蟆五爲番人所

竊聲遂稍石乃歸之廟中色純綠作鷓鴣斑斜文纖麗

隱隱若八卦象內鑄漢伏波將軍鑄歲二月十三海神

誕日粵人擊之以娛神其音闐鞀鏗鏘若行雷隱隱聞

於扶胥江岸二十餘里近則聲小遠乃聲大真神器也

明嘉靖中海盜曾一本謀移去鐵索忽斷不可舉乃已

或云大者自海中浮至其鳴應潮自遭盜劫靈鼃殘缺

遂不復鳴韓碑重勒光燄在蘇詩輝映東西廊

韓碑在廟東廊宋循州刺

史陳諫重書東坡
有浴日亭詩刻

其他立石頗繁夥非不欲觀無暇詳

天文炳煥作神貺大書深刻禮所當循階徧數實有闕

補遺上溯從今倡使臣亦得附不朽願語邦君期勿忘

浴日亭邊理歸棹浮光遠隔金烏翔

廟右小山夜半見日出建浴日亭於

其上今沙漲海遠水影隔絕無復奇觀

衰年濟勝已無具何必振衣空陟

岡連邨林舞仰盛典夾道拜送如頽牆我無他語足慰

勞神宣

皇澤貽豐穰旋艫不假送帆便潮水未生沙

嶼妨

去必乘潮落歸必待潮生否則沙閣不得動名爲海道不及內河與昌黎所述氣象迥殊卽浴日亭

之不足觀日出滄桑之說可徵且韓碑久已不存疑神廟亦非故址然無可考證惜乎碑刻如林未及徧觀若其中更無唐碑則必有故矣

虎門信達日加已

潮源於東南大洋入虎門至波羅廟前波

濤浩森直接重溟卽所謂獅子洋也欠伸風雷噓喻潮
汐潮於十三四五日長辰戌退丑未十六七日長巳亥
退寅申十五乘未時潮退而迅發何減乘奔瀧海珠隱
去十六日乘巳時潮長而還現蚤招客珠江在城南五羊驛前石排湧出彷彿海上浮珠卽海珠石也津亭懸想羅
冠裳神應鑒我肅恭意披拂喜氣盈篷窗何來鄉語頓
清耳癡兒迎面停風檣將抵廣城而三吾至

拱北樓觀元時刻漏歌

當途拔起重城闔勢與鎮海爭雄尊或傳下隱趙佗墓
中央避道開雙門螺旋幾折到樓下元時刻漏今猶存
石臺層累陟三級四壺列置頂接跟一壺高踞滿注水
下竅滴瀝通其源次二次三遞承受涓涓不絕殊逡巡

循階傳送勢斜下
嫡脈疑就旁支分
銅溝製仿破竹樣
如引簷溜供吐吞
典籤寄重乃末座
按時呈露隨漲痕
歸墟欲溢神漢竭
尾閭騰上河車翻
盈虛消息借人力
晝夜晷度良不愆
大書粉版列檻外
六時更替窮朝曛
宵來寧復勞仰矚
更點校精鐘鼓傳
千秋警醒越王夢
朝臺長憶扶桑暎
試從壺腹檢銘刻
目所不及聊手捫
鑄作主名終未辨
元帥府屬銜實繁
鑄題淺俗無足取
粗識延祐其紀元
巡簷周覽粵城景
萬家煙火排魚鱗
憧憧往來密於蟻
銜枚寂若聲不喧
始知超軼塵墟外
高步直欲凌青雲
珠江片石捲衣帶
海舶點點萍浮根

更上一層應轉勝孤危却恐罡風掀斯樓詎止備登眺
璣衡同運通蒼旻民安作息順軌則耳目昭晰無蔽昏
近時鐘表擅工巧懷袖共謂藏天輪佩之傾側判遲速
比勘補葺徒增煩此壺製作謝雕飾但取旋轉符乾坤
不假蜍含續龍吐自覺兔顧隨烏跣流傳已閱四百載
運用簡易宜永遠觀星臺上課疏密異同待與司天論

重游海幢寺

憶昔登初地重來宛隔塵茫茫一宿覺顛落百年身似
欲趨神道終期傍法輪淨名標海住應與海幢親

方丈留虛席迎賓退院先年催渾忘老悟徹不談禪法

乳定誰飲佛衣憑屢傳羨他蕭灑意且祝緩生天

時住持本

無方化去主席尚虛退院僧朗如領眾迎客

自起毘盧閣曾邀作記來倩人殊不免掠美更堪吟妄

語證明易私心懺悔纔鄭虔雖老去鴻爪卽香臺

寺僧嘗請

余作毘盧閣碑記實浼同年鄭誠齋代作今碑勒余名然不敢掠美也

未了圓通義能書方廣經華嚴樓閣現梵夾寶函局本

爲報恩重無如供佛靈幾時歸法藏花雨欲流馨

性於戊申

八月以母病危迫發願寫華嚴經一部至戊午四月始竣將擬裝供毘盧閣上道遠未致

禪宗欲遷化有偈問龜哥我昔留元緒居然學法和家

應憐夢鹿池每伴新鵝說戒勤來聽母嬰江使羅

甲子從桐

城拾得一龜與白鵝同放生寺內鵝
死而龜尙存寺舊有龐運使嶼鹿冢

拄杖宜扶老隨身各有因助將一喝用賜出七旬人往

復供投贈機緣驗舊新從今木上座玉帶可同珍

寺僧以薦

年藤拄杖見貽余以手
扶邛竹杖留鎮山門

英德道中示男三吾姪三典

玉局常攜過昌黎亦遇湘宦游多拂鬱骨肉總踉蹌今
我持龍節迎神望海洋但知西笑近寧苦越吟長孤姪
因依久癡兒省覲妨參差捲輕襪次第集歸航連夕燈
花喜當筵酒瓊香離愁頓披豁絮語更徬徨注意存京
邸牽懷感舊鄉篷窗聊卽次驛路旋分張輾轉元難定

丁寧在勿忘精心杼幕畫潔已飭官方爲愛棠聯萼須
懲雁斷行承家惟孝悌報國重循良彝訓吾曾聽艱難
爾實嘗敢誇喬附蔭莫負露零灑度嶺雲嵐隔趨朝日
月忙此生猶幾別後悔儻無償發詠情何極書紳義所
當水流常浩浩春去已堂堂

保昌道中示三吾

七旬已悵三年別千里聊隨半月賒祝汝總期勤作吏
送余惟望好還家獨憐父子扶攜切默數清明祭祀差
昨清明日更餘始抵保昌薦享遂缺莫更前行趨嶺畔梅關嗚咽有悲笳

舟次憶三吾

江冷爲多雨，船寬覺少兒。還因放溜急，却恐過山遲。久別已忘別，傷離非暫離。曉來元制淚，翦燭與同滋。

聞魏生蔭華

椿年

觀察丁內艱寄唁

驛路紆江嶺，離情迫阻長。遄歸圖話舊，卽次駭奔喪。宦達板輿奉，歡迎梓里光。高年期自逸，勿藥喜仍康。重寄關天庾，輕裝返豫章。寧知成永訣，頓遣促歸航。遠聽傳長慟，摧心軫鉅創。不嫌聊弛擔，特恐恰羞囊。清況應同諒，孤懷孰與商。自慙單舸下，未遂束芻將。牛磨跡常緩，烏啼翼正忙。望塵如不及，執手定相妨。莫解瞻星痛，休教滅性傷。身宜爲國重，名更顯親揚。不毀因年減，有終

垂制常丁寧難絮語輾轉祇迴腸野泊兩方急眼昏燈
似障毫端愁氣繞字裏淚痕藏春夏更時序後先趨
帝鄉披帷重勸慰酌酒薦芬芳

憩仁和鎮

戍列仁和塘宅表大夫第

汎側適有此一家

江流繞襟帶山翠

屢鬢髻當年輕舟過瞥見未審諦今來僕夫飯我亦少
留憩土俗近淳良腴田饒種藝村深市喧隔徑轉林陰
蔽衰年倦行役欲去戀間泄旣喜故鄉名彌感卜居計
空思茅蓋頭幻語夢成囈

余至今未得杭城一椽之居

儻借一枝安

何以異吾淞但笑此中人幽棲未忘勢

卽目示警

官道馬蹄忙春田牛跡密馬倦輒遭鞭牛遲常被叱用
之筋力盡飼以芻豆畢物蠢莫辭勞人靈徒好逸虛叨
天地生寶恐鬼神嫉僮奴不足道厥主宜身率觸目倍
兢兢直書戒子姪

自臨江至瑞州作

歸路溢三千排日不容懶經過潁江郡破曉出山館春
寒輸老健稱體征衣短巖際宿雲披溝中新水滿麥隴
秀漸漸菜畦花纂纂青黃紛間錯錦段豔初斡稻田正
扶犁人牛有常伴習慣總忘勞周旋意蕭散乘時在天

地敏作無水旱松秧亦張鬣竹箭漸抽筍不資人力助
似畏滋生緩故知元氣蒸脈發語非誕雲油汎催沐吹
萬叶陽琯行役當娛游塵襟澆雪盃詩料不勝收詩癖
那能斷

還京

彈指青陽九十過嘉平從役返清和 恩綸早渙春常
滿香縷虔升海不波冊晉 東朝廷慶永星輝南極降
祥多秩宗銜命惟常職詠罷皇華聽曉珂

招乳燕詞

寓齋領生趣梁燕育五雛云何出求食不返如驚通黃

口惟待哺忍飢不解呼物命迫朝夕仁心感僮奴布梯
取之下菽乳填其味母子處堂日自然真性孚飲啄良
未慣毛羽旋豐腴終然背母去猶勝巢中枯茲焉強相
飼生死還同途聞以鳥養鳥莫參人力俱樊籠弗善也
卵殼足恃乎得食恐無濟且復延斯須羈雌庶歸止垂
斃期復蘇勿追鷹隼翼勿犯蛟龍鬚佇聽呢喃語豈獨
慰遺孤主人同賀厦敕僕宜傾壺

收飼雀雛戲作

涼堂攤書坐瓦雀學飛墮逡巡狸奴搏備豫雕籠鎖失
子惟母求不求應委我粟粒與瓜瓢供給無不可養成

行放去檐上呼羣夥銜環非汝能望汝計先左

虛堂燕坐追和大兄與柯嗣雅表兄倡酬韻

火繖憑遮碧樹梢午餘先趁鳥安巢

入伏例得早退

芳樽正喜

除浮蟻蔬食何妨足醉緇書爲校頻偏有誤墨因磨熱
任生泡誰攜冰雪供銷夏詩格清寒擬孟郊

松架何須倚翠巖蚤將內熱盡情芟泥金蘸出空調筆
疊雪分來且製衫襍襪豔稱三語辟縹緗雅勝百城監
行藏悟徹堂坳水幾見舟膠倩舉帆

題元王淵秋柳芙蓉圖送同年夏嘏田

扶黃

秋部

歸孝感熊鶴嶠

爲霖

太史歸南昌

芙蓉颭秋江老柳意蕭瑟魚翠慣雙飛俄看借枝一應
爲惜離羣回頭如有失朋懽祇萍聚寧比膠投漆燕山
望楚水九派更歧出明明漢陽樹南浦雲遮密相送宛
同歸歸途仍隔驛蹤跡任分張情懷自專壹難教帆去
遲聊取杯行疾尋詩因讀畫筆墨重牽率悵望水雲鄉
木落素波溢長空友聲遠獨鳥復誰恤

重得鞋拔子志喜

先府君有牛角鞋拔子自姓未生之初傳用久矣昨歲遺在熱

河旅舍極爲悵恨今年重到館人陳叟遽出以見還喜而有作

納履便

平

踵息制器參角根

借用昌黎羅縷道妙角與根語

物微先澤

寓旅瑣古風存不是行來慣難兼得失論拾遺蠲敝俗

淳化驗邊垣

鞋拔子自來詠物所無再作一首

君夫八百里蹄角喜常瑩殺風景爲誰射棚武子勝名
材牛戴牛制器豈無剩業緣因善走果報宜在脛鞋拔
製斯傳踐形名自定韃結踵時決措同竿指徒贈蹬二分

垂在外斷趾屢難稱膜隔不相容投隙有微徑用如距
斯脫快若舟起矧佩之雜觶鞢良足備持贈朋酒憶供
幽商歌聞叩甯躡屨總無需切磋思未罄卽今殊便事
手澤矧猶凝珍重去珠還底須光照乘短韻窘鋪張鑿
空鼓餘興詞賦例多夸詠物聊取證

奉和 皇四子 皇六子見慰墜馬韻志謝

天廐何堪借與騎，謬誇矍鑠強支持。
馳驅久讓征夫捷，蹉跌偏蒙聖主知。
裁慰雲瞻仍晝接，勝逢大藥是良醫。
紀恩未就瑤篇及，詩課催將痛定時。

周隍騎從往來頻，執策誰能選駿真。
祇愧據鞍疎控勒，莫嫌張去脈失調馴。
輪轅自足環沙塞，拜起猶堪覲玉宸。

宸遄發底須攜酒看，賡吟殊勝杜陵人。
八月初十日始至熱河墮馬傷

膝隨衆於惠迪吉門恭請聖安仍騎從至師子園還
官卽蒙召對溫旨垂詢旋命派蒙古大夫診治是日
宮門班退牲徑入書房未知召見非荷
皇次孫引從西掖橫度中禁幾不能趨赴也

張三營示王甥馭伯虔

鄉井久離別京華亦暫逢何期蓬梗聚却度塞垣重幕
畫經綸借筆耕甘旨供顧余悲逮養竊祿愧兼容名實
寧堪較升沈任所鍾述懷同悄悄卽事轉憧憧萍泛留
深沼雲浮戀舊峯安驅惟下澤暮景已高春折足疑占
鼎新硎慣及鋒無憂幾相見有役輒過從不假蛩攜歷
應知柏悅松阿翁憑寄祝湖畔待支筇

畫眉簪

窺巢探伏卵簪髻比銜珠爲借畫眉嫵誰憐黃口雛籠
棲應鬪少釵墮復完無爭似桐花鳳飛隨雲鬢俱

三俊信至屢問膝傷適閱蘇詩至與頓起孫勉泛

舟作因疊用其韻寄示

維昔重儒生文武互經緯短後易長裾幾聞增感喟吾

年過伏波矍鑠良足慰從狩匪從戎據鞍彌有味一跌

駭旁觀毛起乍如蝟今仍還入塞壯士復何畏療傷資

虎脰

巡檢夏熙餽此

健啖想鹿胃

前歲得之曾

公膳雞鶩兼無

勞徒給餼

近蒙頒賜雞鴨

年豐芻粟賤慳用自不費簡出斷人

過無求全我貴同巢瞻去燕握手笑逢佛胃筵重罷直

冷署坐調氣

諸位

皇子

皇孫既歸蛙在哨內即不

入直專司本部到熱河復侍

亦先行姓仍

拜起實云艱跛曳則猶未結褵久無張履

霜寧怯魏老雁計程歸勿煩黃口沸足瘳吾尙慙況以

老爲諱

寒人思上天慢勞占象緯安國墮車來然灰臍深喟我
幸傍台垣忍痛亦堪慰闔戶讀蘇詩雋永有餘味罪言
徒召謫衆矢應集蝟寬大值熙朝都教施去無畏溟海
縱舟航嶮雪浣腸胃淺深隨所得稱事乃微餼敢矜窺
語妙但苦轉辭費把筆獨沈吟連牆謝豪貴不逢江東
鶴寧禦嶺南狒便作蹕浮屠攣形葆真氣哀樂寄情殊
兒輩覺來未入塞近依關歸闕行瞻魏中夜起嚴裝風
高星影沸溫酒任頻催阿誰嫌觸諱

靜廉齋詩集卷十四終

靜廉齋詩集卷十五

仁和金 甦雨叔

恭和

御製重華宮茶宴廷臣及內廷翰林並賜淳化閣法帖

聯句得詩二首元韻

癸巳

階蓂吐秀浹元辰日暖彤墀恰進春

時正月十二日立春茗盃漱

芳仙露湛墨光浮帙古香鄰 恩叨曲宴時加午瑞應

宗祈典祀辛

十一日祈穀值雪

嘉會喜瞻

天藻麗九英梅影

愧隨身

習習條風轉上林堯文義畫許聯吟三希衍派精排校

靜廉齋詩集

卷十五

十卷分籤細討尋汝絳向惟傳夾雪日星近仰寫澄心

微臣

珥筆何榮幸大化還淳誦御箴

是日蒙賜紫檀鑲玉如意
一柄壽山福海歛硯一方

題九成宮圖應皇四子教

並輦來游喜易嘖清河料事遜封倫不知竟是何王殿
貞觀之初又一新

醴泉涌出驗嘉祥千古碑銘翰墨香記得直臣曾有疏
上皇留熱帝追涼

驪宮妙舞送仙音此地空思樹羽臨避暑不妨邀敕借
却從花萼見情深

增城幻出翠微中飄忽風雲少路通只是仙山樓閣景
不須傳會九成宮

奉題 皇十一子元錢記後

有序

古錢一枚其文似篆似梵姓藏之四十餘載茂有識者

近訪之大西天喇嘛云是淨施通寶四字顧莫辨所出

錢辛楣大昕學士見之曰嘻是元武宗至大二年所鑄

大元通寶也載在續通鑑綱目特未著其文爲當時國

書故近人莫識耳遂出元統二年加封顏子父母制詞

碑刻校之則四字適散見其中是固信而有徵矣 皇

十一子因命工寫圖仍作元錢記以表其事蓋有慨於

改訂之難往往疑信參半而尤喜博雅之終在吾儒也
姓更撮舉其略爲五言四韻以跋之

但取字略識何須口不言梵書摹近佛鈔法變忘元證
有顏碑在博歸儒術尊 天人剖疑信妙理濬泉源

哭馭伯甥

不比韓康別殷浩翻教安石哭羊曇萍飄同憶湖邊艇
轂轉徒聯塞外驂意氣正緣知己誤去留如有俗情耽
浮生夢幻曾何戀祇痛高堂白髮鬢

連歲熱河晤敘並有歸志甥竟以主

人情重事繁小復
遷延遘疾而歿

閱唐人寶常算老重經癸巳年句感詠二絕時清

明前三日也

感興仍看經癸巳達生不藉守庚申龍蛇讖擬平安過
去臘回頭歲在辰

周甲還羸一紀全底須算老怯殘年所嗟同值清明節

寶出句云看春又過清明節春隔江鄉憶墓田

曾孝女衍綸輓詩已未庶常歷任郴州牧長清會

許字未行乾隆戊寅臘月二十四日夜火發寢
室人不能救母促女出女掖母不起竟與俱斃
火熄出尸相抱如一體州人
爲立祠柳江上得旨旌表

變起三從始名超四德先曾聞女不婦正取義歸全丹
爛髮膚外烏頭霄漢邊儒林重巾幗無忝孝經傳

南苑隨葛山前輩退直感舊奉呈

獵罷攤書講席移朝晡輿馬重追隨卽看南苑分班日

此次奉

旨分班

恰似西江奉使時在昔盛稱嚴諭教

前同在江右聞

述鄂虛亭雷翠庭諸先生師範至今心肅

於今聊足効驅馳風光廿載渾如

昨雙鬢空慙對柳絲

五月初四日得假紀

恩

衰年交八九重五薄征途奏事先期會鳴珂競走趨風
微殊瑟縮路熟乍崎嶇強就經帷息誰收戰汗濡定知
寒蚤中頓覺氣難蘇龍種仁心惻虎門驚視瞿聞天憑

請急扈蹕儻占需 俞旨微非望 鴻慈軫病軀清曹
良少事老馬不須驅三月方從役終朝遽脫逋留家便
醫藥伏枕慰妻孥側想翠華舉通衢白叟扶獨慙瞻送
隔無復禮文拘講席塵行積容臺跡轉孤曠疎寧得已
安處豈常圖感激增兢悚幾時遄喜孚

五月十三日望雨作

麥秋減潤黍迎膏執熱誰能解鬱陶星蹕計程方灑道
天漿循例正磨刀苾芬典祀瞻時舉肸蠭神功信可操
閔雨久應推傳去義靈旗環合捲雲濤

是晚小雨次蚤
雷雨大作梅雨

遂行

堂東小院有竹一叢三吾甲申所種也昨歲開花
枯盡隆冬積雪壓之無復生理矣今年春夏漸
茁新叢用昔時種竹韻寄三吾志喜

宦游嶺嶠屐齒窪塵襟寧復函詩芽留栽庭竹已十載
去秋憔悴頻開花欲落偏榮怵先戒枯篠脆折難編笆
拙萌儻趁蟄雷奮殺草願逢尺雪加豈知稚子勁節在
不怕醉迷歸夢賒淩風遲聽管吟鳳解籜頓看跼隱蛇
平安附報意差快錦裯佳兆期傳家豆籬更遭蔭深碧
前種竹時障以豆籬今擬復設雨足閒階滋昔耶

諸城相國聞姓屢病因垂訊有無姬侍戲呈二偈

法喜由來祇寓言散花不染離塵根文殊未到維摩室
妙諦誰參不二門

黃面正留婆子在也同枯木倚寒巖應知圓鏡齊空有
觸背隨拈了聖凡

病中示內

相看俱過七旬年賓敬應慙古有然只此得如兄弟否
清宵風雨對牀眠

承 皇長孫以詩問疾和韻奉謝

經闌愁暴疾調藥拋杯酒一朝矍鑠翁幾作亡是叟內
直禮森嚴拄杖敢隨手中官兩扶掖偃僂循牆走神色

頓殊常垢面合稱耆行年七十一寧必百年壽微生感
天睠扈從輟官守給假奉 恩言榮滋返枯朽 皇孫
謬虛席燕石充佩玖新詩起我病欹枕強祇受呼兒聽
其讀清韻浮簾牖曠課遂連旬無責自知咎依然勞撫
問屬筆敏於口身遠箭抨弦心忤杵投白秋爽氣應蘇
細旃拜稽首

諸城相國見示和章依韻報謝

便從色相見真如居士何嘗盡埽除若伴浮屠演空諦
裴休應愧在中書

示病恰宜逢結夏坐經小劫日如年正教行近摩登室

神呪加持免破禪

聞內子理琴勗諸女傳習

知音何必問中郎靜好閨庭母訓長會記山園同按譜

聊同嬌女尋琴譜乙亥池州寄內詩也仍看邸舍獨開囊離鸞雙鳳情原

別已寡女玉軫金暉製自良留得外家風雅在硯應傳壻

例堪詳丙子傳琴於外姑姚孺人琴亦胡氏物佳器也諸女有傳其學者當以琴賞之

題後漢逸民傳後

物理細推期後凋人生義命難均調繞指化由鋼百鍊

挺立移得花凌霄事見老學庵筆記草根偏犯雪霜出玉質却

隨煙燄銷空山戢影避羔雁枯蟬何怪輕金螭

小蓬萊集題辭 有序

周迴川作合筠連見所屬巡司場山水之美數十里中
目不給賞得景凡十有四曰迎客峯曰獨秀峯曰兩美
合曰攬雲梯曰立仙崖曰青蓮嶸曰碧玲瓏曰蜿龍巖
曰清風岫曰僊人玉鏡臺曰千巖聚曰秀石林曰雲碓
溪曰溫泉畝博陌切井發也而總名曰小蓬萊各系以詩寄余
同賞藏之六年未答病中檢閱爲作題辭

柳州游記景重開靈境天教待逸才不遣茲邱移鄴杜
爲煩仙令署蓬萊繩橋轉運隨時足

迴川屢運糧金川

藤杖扶

將幾度來六載誦詩長想像正如風引客船回

奉和 皇四子問疾三首韻

頻年扈蹕有常程祇學游仙戀鶴京宿疾頓增愁
天慈垂恤荷生成假寬愧似偷安計詩到珍踰饋藥情
伏枕幽憂嫌室暗驪珠粒粒借光明

仰屋誰能遣悶懷賡吟長憶傷瑤齋元知形病神非病
但見詩佳興自佳性癖夙耽忘死地病閒餘事寄生涯
不圖北渚愁余過蚤盼新篇筆硯排

皇子以和詩勞神暫留第一首嗣

聞漸愈更作第二首并寄

侍直惟應暫臥廬那堪長夏竟休居征行已覺程期近
瞻送都慙禮節疎痿痺不仁良有素支離其德儻留餘

卽看問病參空相變滅何妨證六如第三首則將往執河寄懷留別原注
有見與諸城相國談禪往復云云故結語附及

點校南北史戲作五君詠不必效其體也

金行方告謝江左神人生長刀志一掃獨步驅干兵安
攘資代德纂弒開先聲愛子託人去草草關中平

鬪將嫺毫翰奇奴筆勢低防身書案鼻脫命射棚臍壁
數當承宋刀鋒孰抗齊黃金土同價儉德感遺黎宋高祖原

名奇奴見宋書符瑞志

蘭陵家禍烈終始自蕭郎代景屏藩破傾齊骨肉戕生
靈等魚鼈血食靳蒸嘗佛助期頤壽憑將宿業償

仗義翦同盟依然篡奪行艱危倚猶子嗣續借難兄天
祚及身絕山陵不日平爲傳鬚附骨却顯復讐名

據勢侔王莽同心勝呂娥力圖家化國忍聽室操戈官
甲防惟勇靈蛇蠱自廢六朝方一統兆亂復如何

從舅嚴曙升煥先生晚晴軒詩集題辭

外家風雅盛諸舅例工詩

謂大舅父觀宸公啓耀二舅父楚鄰公啓煥四舅父東白

公啓煥從舅鑑張公啓傳淹公煥也

茗水聯清唱琅巖

先生號擅好詞聲

華騰輦轂壇坫望旌麾共許才無敵寧知命數奇鹽車

騏驎困原草鵲鴿悲衣食常奔走萍蓬任轉移庾蓮參

幕畫邊笥啓經帷洗劍如添僕留書卽課兒羊城五筦

會虎踞六朝基弔古人千載懷鄉天一涯有時尋舊隱

何日遇真知氣壯終蹉跌情深空別離風簷十三度巧

夕海天思

以上六韻皆隱括詩中所述

雁去常謀稻驪存每載脂嘯

歌酬契闊觴詠慣追隨快得江山助兼包文字奇身名

歸述作憂樂借娛嬉迎燕催桃暇

集中二詩題

書焚盜警遺

皆集中

晚晴人世重寸草子心危片羽勤收拾明神想

述事

詩稿散失者多子金門垣等搜輯成集詳見跋語

開函欣受讀終卷忍停

披杖履童年侍光陰駒隙馳傳家真有託跋尾更何辭

愧奉先公集雕鐫擬重施

先榮祿詩集乙酉刻於廣東寄版漂缺尙待重刊

聽內子彈琴志喜

曾聞牧犢子七十無妻空鼓琴老夫今年七十二却聽
七十老妻彈好音古來閨閣知音者衛女思歸蔡姬寡
離鸞別鶴結長悲雙鳳和諧譜自誰鄰母神明徒隱几
宣文絳帳無復樂聲起姚伊姬妣君后皆神聖百年裁
得宮商應愚賤何容妄擬爲但聞警夜烏啼暮妾媵雞
鳴夫婦風雅傳絲桐靜好情纏綿瞻星射雁只似少年
事不知偕老終何年聽卿琴勸卿酒富貴壽考誰兼有
冰絃續自鳳觜膠應喜手揮長耐久放歌正足爲汝壽
十月十四日
七袞悅辰也

陳情得請紀

恩志喜

一從丹陛聽臚傳竊祿旋踰三十年蒲柳驚秋生意減
山林逸老主恩全但教泛艇聊成宅豈必歸耕盡有
田經席濫竿嘗侍直夢魂仍傍虎闈邊

鄉舉回思弱冠初朝端蘭譜悵無徒作書已覺豪鋒禿
抱影惟留美疢俱晏起蚤眠同孺子吟風弄月就歸途
翠華頻幸游歌地白首元依明聖湖

青芝啓秀墓門幽三錫褰封四代優昔去幾曾完馬鬣
丁巳封樹未畢
卽覓食出游
今來長得伴松毬過家上冢浮榮暫倦

鳥投林宿願酬照耀重泉綸綍在貞珉採取待雕鏤

嶺外遙憑急遞聞癡兒寄語絮云云典司已讓夔龍侶
情性真宜麋鹿羣自解趁閒謀作室不勞行役望飛雲
文章報國終頽廢民社還看奉職勤

九日常和大兄己未見懷之作頃編錄遺稿始見
庚申尙有重陽寄弟一篇依韻志感

佳節常賡饒字詩遺編重檢覩清詞壺觴佇向松根酌
風雨催將淚點垂落帽賓朋憑見戲登高兄弟幾同時
獨留老圃秋容悴歸計先應地下知

寄姊婿王陶軒

九載前頭復見君松楸同指兩山雲斜陽返棹湖波靜

越宿離筵酒琰醺夢裏相望申舊約林間無愧免移文
歸期真箇明春遂風月行看二老分

憶馭伯甥

羨爾家聲振期余宅相全還山猶有日埋玉已無年斷
梗關河阻靈樁冰雪堅相逢方失喜應復淚雙懸

仁錢會館落成蒙

皇六子作八分書題湖山凝

秀額并附跋語獎勗肅詠陳謝

跋云金少宗伯海任先生倡建仁錢會館成囑
余署榜以頌其堂因爲題此四字或疑此似嘉
美彼中勝槩於此館未合余曰不然夫凝者聚
也成也舉兩邑之英秀而羣聚恆於斯成就恆
於斯得不歸美於此
館乎遂并識以爲祝

水脈通三折書林重八分揮毫傳鶴禁懸榜動星文日
仰中天度波迴少海濱推恩培植樸獎飾意彌勤

書近狀寄三吾二首

日高貪睡美門靜喜人疎引興盈樽酒消閒壓架書輭
紅留故轍虛白驗吾廬藥物扶持穩無勞問起居
流鶯傳響近候雁寄情疎南北紆長道浮沈任短書離
愁付兒女生計忘田廬待漲三篙水聊尋五柳居

再寄三吾二首

待作尋巢燕方爲退院僧顏紅徒有酒鬚白免疑冰發
帙慙塵點添香喜縷升手僵臨凍硯筆落擬癡蠅

寓形元似客制行略如僧事集常含瓦心清但語冰暫
聽琴一曲不限酒三升矯首雲中鶴誰爲驥尾蠅

奉謝

諸皇子和韻送別仍贈序贈詩

長篇勤製序全韻巧裁詩但入如神筆都成絕妙辭賡
吟隨所寄獎借愧無遺虛美期徵實桑榆欲補遲

奉別

諸皇子二十首

有序

姓白丁丑蒙

恩入直尙書房中間督學江西三載至

今歲癸巳在直實十有四年夏秋久病痺廢陳請解職
聖慈俯准回籍調理明春冰泮將返舊鄉竊念入直在
未奉 諭旨分課之前自 皇三子循郡王至 皇十

二子暨 皇長孫 皇次孫皆嘗輪日侍書後又屢經
總師傅導 旨奏派專侍 皇四子 皇六子 皇八
子 皇長孫諸殿下雖年時深淺不同而愚慙之性知
無不言德量優容並微採納今自拜違令範已閱三時
然餽問之使繼踵於道見懷諸作情溢乎辭曩時一話
一言往往敘之文句瓊瑤辱贈木石知慙感極悲來悞
先承睫別無美報但寫鄙忱輒成五律二十章獻之座
右用備覽觀儻常效先民之詢芻蕘應不厭古人之傳
糟粕云爾

龍樓嘗先

去

馬鶴禁共聞雞

三

冬夜直至景運門每逢
諸皇子下馬講誦之次

屢聞雞聲

侍直情多愧辭榮意轉迷常談嫌瀆進短晷惜分

攜矇眊還陳誦苔牋泚筆題

咫尺

君親戴彝倫忠孝兼古猶勞勸戒今豈待箴砭

但被恩慈渥彌欽禮法嚴中天承久照少海慶波恬

虎闥長教胄三代一堂全式穀規模近連枝則倣專鵠

原曾有慟

皇三子循郡王榮親王皆姓入直後薨逝

皇五子

花萼倍堪憐記

釋斯干義源通常棣篇

皇四子嘗課式相好矣無相猶矣姓竊爲引伸其說

金玉精純質還資追琢章三風詳致倣九卦慎毋忘典

學功方懋親賢德乃彰權輿惟主敬日鑒凜天光

黎蒸蒙

世德怙冒仰深仁儼列屏藩重勤宣惠澤均

露華霑湛湛麟趾啓振振元氣同春盎天心福祿申

武備 皇家重鳩車卽馬鞍春蒐移上苑秋獮從木

平

蘭但取馳驅貫寧須鳥獸殫開園頻放鹿願體 聖恩

寬 秋獮獲禽有定數每園中鹿多卽傳 旨開園縱去

三才敷萬化一德統于誠孚信豚魚格馨香典禮成還

堪返淳樸尤足助精明妙義中庸備經函講席橫

傳恭留格訓基德德斯崇抑抑常知戒謙謙自有終威

儀徵定命寅畏矢和衷五事羣瞻貌巍然作肅功

主敬仍行恕終身奉一言平施情不遠絜矩理無煩醞

釀中和氣開通道義門求仁歸克己精蘊合乾坤

用論語注

禮嘗因菲廢奢卽與驕期節用留餘足清心鮮失宜虧
盈誠炯鑒守富亦良規數典恭勤匹無如儉德垂

行健維 家法祇承垂裕心儻焉不終日何以惜分陰

奮迅輝光發隳頽疾疢侵若華凌碧漢樗散愧成林

心田培穀種日鏡耀靈臺寡欲寧惟色藩身豈在財淵
衷常澹泊峻望轉崔嵬清淨真藏樂虛空絕點埃

德成兼藝事貞固總無頗筆正由心正形和驗氣和勵
精神自聚養壽福偏多玉體應知愛齊看黃髮皤

史學根經學千秋化理昭妍媸臨水鏡金玉備科條便
作觀優劇殊勝入畫描觚生駉駉同好 去可煩邀

聖功期養正，隳難易成訛。心性元通佛，詩文自有魔。莫嫌儒入墨，聊喻海先河。證道同諸子，何妨盡網羅。

嘗聞君子過，爲作小人緣。難攝羣陰伏，旋教柔道牽。縱情由下比，失意在中賢。婦寺憑推類，薰蕕蚤辨旃。

講授元分席，箴規匪異途。護田資守望，閔雨效嗟吁。出位將毋過，推誠幸不拘。坦懷長翕受，集益本詢芻。

承華昭法戒，纂輯擬成書。鑑古輸君寶，標名類子虛。

性嘗

擬分類纂輯承華法戒一書竟不及就

更無臨別贈，那得積忱摠。短韻如

堪採分鈔付小胥。

新篇多獎飾，瑣語半塵蕪。白雪知誰屬，丹誠諒不渝。未

能追麗製翻覺近迂儒衰病江湖去應憐彩筆枯

暮景纔餘幾寒松儻未彫兩宮連祝慶一老幸趨朝

毓德隨年劭論文閱境超細旃期暫侍佳句領瓊瑤

奉和 皇次孫送別韻志謝並呈 諸皇子

浮生類萍梗泛海阻星宿殊榮列先甲清禁觀齒冑輔
翼廁疑丞趨蹌森左右頓忘散木衰但仰若華茂朝窺
金爵棲夕數銅龍漏說義備箋疏尋章兼句讀虎旅自
分班雞人無隔晝戰勝卜商肥病催沈約瘦茹痛劇驚
弦哽胸輸吐綬時苦胃痛一水隱仙洲三天別神構桂楫佇
安流驪駒方載驟歸飛雲路長優假 聖慈厚回思昔

蹉跎誰遣保耆壽心摧性命輕跂祝德業懋

壬辰熱河墜馬正蒙

召對跂步艱難非

皇

矧荷諸

天人每憐真學究

雅韻叶壘簾明珠滿襟袖二泉容寄訊九老定如舊

來詩

囑過無錫寄問樂泉

除夕謝英夢堂

廉

司寇餽歲

坡翁手柬訊平安遠餽清腴稱冷官鹿尾從畋分賜饌
瓜蒞隔歲助春盤也知佳趣難持贈聊寫殘牋博笑看
跛曳已慙朝謁廢敢將名紙擾門闌

靜康齋詩集卷十五終